

1 Ick Euert van der Marcke In der tyt eyn geswaren richter ton Steynē Cruce bynnē den Ahues vnnd ton Ottensteine van we=  
genn vnnd beuele des hoichwerdigenn hoichuermogenn Fursten vnnd Hernn, Hern Franz confirmerter to Münster vnnd  
Osenbruge Administrator to Mynden, myns gnedigen Fursten vnnd Hernn, doe kundt bekenne vnnd tuge apenbaer In  
5 stoel dess gerichts myt Ordele vnnd myt rechte vnnd myt mynē Cornoten als myt Hinrick Spoltman vnnd Gerd  
Reddeker Borgermestere vnnd Schepenn bynnen den Ahues becledet vnnd besetten hadde woe Ick myt rechte solde Gekomen  
vnnd gegenwordich personlich erschennē is de Ersame Wilhem Ludinchusen vnnd bekande aldaer myt synē vorbera=  
denē guden mode vnnd vryē willen vngenodiget vngedwungen vnnd vngedrungen vnnd verswigen nicht wolde by sick  
entholdenn In wath mathen dat selige Hinrick van Kernebecke vnnd he in dem Jaer XV<sup>c</sup>XXVII<sup>o</sup> thorstmar van  
10 seligen Mester Steffen Boner vnnd Johann Cock gogreuē etlicke penninge entfangen hadden, de welck enn van fromē  
luden gegeuē vnnd behanet weren to troeste vnnd salicheit erer selen gode dem almechtigē bekant vnnd vnuerborgenn  
to noittrofft vnnd in behoeff eyn elenden hues den gemeynē borgern vnnd borgerschē samt knechtē megeden vnnd In=  
wonnern tom Ahues medde to tymeren daer ynsunderheit de myt pestilentie befangen vnnd gefandet worden ere geholt  
vnnd leger daer ynne theben, auerst neymantz van butē, daer men oick eyne erlicke persone man eder frouwe in dat  
15 seluige hues nemen solde, er verblif daer vor vrig theben vnnd de krancken to gewardenn, vnnd dat also in ewicheit  
vestelick wall tholden, daer oick de Borgermestere vnnd Raetlude der Stat vnnd kerckē ton Ahues eyn vast getruwe  
ypsicht hebben solden dat daer geyn infall eder yenige behindernisse ann geschege, so de wile dan selige mester Steffen Boner  
vnnd Johann Cock in got verstoruen vnnd Hinrick Kernebecke seliger myt den entfangenē penningē eyn elende hues vpge=  
richtet vnnd getymmert hefft so dat myt eynē garden daer to horende belegen is bynnē den Ahues vnnd de seluige stede  
20 myt den garden van dem Borgermestere vnnd Schepenē ton Ahues gekofft staenn in den vtersten walle vnnd dat  
elende hues genomt, soe dat Wilhem Ludinchuse vursc. my Richter vursc. mitsamt mynē Cornotē vursc. geoget  
vnnd getoent eyne genoichsame qwitantie, daer medde he vnnd Gertrudt nalatene husfrouwe seligē Hinrick van  
Kernebecke van den entfangenē penningen vnnd tymmeringe des huses vnnd gekoffer stede vnnd gardens van Jo=  
hann Cock gogreuē ganss heill vnnd all verlatē vnnd to ewigen tidē myt fruntlicker dancksegginge qwiterth is, vnnd  
25 danoch van den vorgemelt entfangenen penningē verouert tseuentich goldene rinsche gulde de an jaerlicke  
enthe belacht, Item derttich an Lambert schulte Hoff ton Ahues Item twintich gulden an schulte van Werck to  
Alstede jaerlix eynē gulden vnnd de anderen twintich goldene gulden jaerlix eynē an Bernd Wynmans vnnd  
Fenne sine huesfrouwe vnnd eruē, allet na vermoge vnnd innholde der seluigē principael breue daer van sprekende  
vnnd hir medde by auer gegeuē, myt welken renthen dat vursc. hues prouisor de daer to van Borgermestere vnnd  
30 kerckrade verordent in guden wesen dake vnnd gerake holden solde vnnd den gennē, man eder frouwe, de in dat hues  
angenomē de kranckē to gewardenn daer van latē tokomē asto men des na gestalt des huses gebreck vnnd tymers  
verouerē konde vnnd wes dat men myt den seluigen auerkumt vnnd eyns werden konde, dyth vursc. hefft Wilhem Ludin=  
chusen also wo allet bauē geschreuē waer to syne vnnd to ewigē tiden durende vme salicheit willē syner selen, desse auer=  
giffte vnnd foundation so de andernn de des eyn medde wettē als vursc. gehat vnnd alle verstoruē myt minē Segel  
35 to bekrefftene gebeden des ick richter vursc. bekenne vnnd heb mynē Segel witlicken beneden an desse foundation gehangen  
vnnd to verder vestenisse aller desser vurs. puncte Soe heben wy Hinrich Spoltman vnnd Gert Reddeker Cornotē  
vursc. vnser Stats Secret Segel medde vnder an desse foundation vnnd auergiffte gehangē daer medde by an vnnd auer  
werē vmestant dess gerichts Johan Ludinchusē Johan Spoltman vnnd Wilhem Holtman. Gegeuē in dem Jare vnser  
hern dusent viffhundert XXXVIII vp mandach na dem Sundage misericordie Domini.

(Umschrift Karl Tücking, 1873)